

Transkription von Urkunde ZET 1494c

Ort, Datierung: Zerbst, 1494-02-17

Signatur: Stadtarchiv Zerbst, IA, 301

Inhalt: Rat der Stadt Zerbst: Rentenverkauf

Wy Borgermeistere vnd Radmanne der Stad Zcerwst Bekennen Jn dusszen vnsern / briue vor vnns vnd alle vnser nakomelinge(n) vnd vor alsweme die dusszen / vnsern brieff sehen horen adder lesen dat wy mit eyndrechtlikem ripen Rade / gantzen weten willen vnd fulborth der wittigisten by vns von vnser Stad vnd / gemeyn wegen vor thweyhundert rinsche gulden die vns tor gnoge gantz / betalt vnd forth in vnser Stadt witliken nũth vnd fromen gekomen sin Rechtes / vnd redelikes kopes vp liffkop vorkofft hebbenn vnd vorkopen Jn vnd mit crafft / dusszes briues dem vorsichtigenn hanszen keiser borger der olden stat madebroch / Agaten szyner eliken husfruwen vnd hanszen vnd annen oren kindernn / to oren vier lieũen die wile sy ale vhire adder orer eyn leũen twintech rinsche / gulden duchtig jn golde vnnd mü(n)the adder szo vele groschen alsze die gna(n)ten / gulden gelden mogen Jerliker lyffrente die wy dem mergedachten hanszen keiser / Agaten szyner eliken huszfruwen vnd hanszen vnd annen oren kindernn / dý wile szy alle viere adder orer eyn leuen von vnser Stad bereidesten Schoten / tinszen renten tofellen vnd vpboringe wu vp vnserm Radhusze dy geũallenn / vnd war ane dy szin alle Jar na giffte dusszes briues vp den Sontage / Jnũoca(vi)t Jn der olden stat magdeborch gutlikenn vnd wol todanke ane aller / gerichte geistliker adder wertliker vorhinderunge vnd Sunder eynige Jnsage / vnd alles geũerde reikenn vnd betalen szollen vnd willen vnd wanner / dussze velgnante hans keiser agata szyn elike husfrũwe vnd hans vnd anna / ore kinder alle van dodes wegen dat god thom besten wende auegeghan / szýn dan vnd nicht ehr szo szal dussze liffkop vnd vorschriũunge gantz von / vncrefften machtlosz szyn vnd bliũen vnd wie merbestymden Borger=/meistere vnd Radtmanne vnd vnse nakomelinge sollen solcker thwintich / rýnsche guldenn adder szo vele mũnte vnd groschen wu obgnant lyffrente / vnd thweyhundert rinsche gulden houetsum(m)a gantz quijdt vnd ledich szyn / Des to orkunde vnd vhester holdunge hebben wy gedachten Borgermeistere / vnd Radtmanne vnser Jngesigil an dusszen vnsern brieff laten hengen / vnd Geschreuen Nachre Christi vnser henn gebort vierteynhundert / Dar nach Jm vier vnd negentigstem Jare am mandage nach dem / Sundage Jnuocauit